

PAGTULON-AN 24 – SI PABLO, ANG PILOTO SA SAKYANAN SA KALUWASAN

Mga Sulat ni Pablo

TEMA: Aron sa pagpakita sa katungdanan sa mga magtotoo sa pagpahayag ngadto sa tanang mga tawo kon unsa ang laraw nga tinago sa Efeso 3:9.

Sa miagi, mibiya kita sa dapit nga adunay babag nga HUNONG nga gibutang sa DALAN SA GINGHARIAN, diin kita miliko ngadto sa mahimayaong DALAN SA GRASYA. Unsay nakapahimo sa DALAN SA GRASYA nga lahi sa ubang mga dalan diha sa DALAN SA KINABUHI? Si Pablo gipili aron sa pagsulat mahitungod sa *mga tinago o mga misteryo* sa Dios sa diha nga kini gipadayag sa Dios kaniya. Ang iyang mga sinulat gitawag nga mga sulat ni Pablo. Kini sila ginganlan sumala sa ngalan sa dapit; diin ang mga magtotoo nagapuyo nga gusto ni Pablo nga alagaran o mga ngalan sa mga magtotoo nga iyang gisulatan.

Usa ka adlaw, ang usa ka tawo nga ginganlan ug Tiquico miabut didto sa iglesia sa siyudad sa Efeso, uban sa sulat alang sa mga magtotoo nga gikan kang apostol Pablo nga nabilanggo. Kini base sa Efeso 6:21-22: “Ug aron usab kamo mahibalo sa akong kahimtang, ug kon unsa ang ginabuhat ko, si Tiquico, ang hinigugmang igsoon ug kasaligan nga sulogoon sa Ginoo, magabalita kaninyo sa tanan. Gipadala ko siya kaninyo alang niining maong tuyo aron masayud kamo sa among kahimtang ug aron siya makadasig sa inyong mga kasingkasing.” Sa dihang nabasa sa mga magtotoo ang maong sulat, nakakaplag sila ug mga bag-o ug kahibulongan nga mga kamatuoran niini. Sa ika upat (4) nga kapitulo, si Pablo nagahisgut mahitungod sa **PITO KA USA**, nga mahinungdanon kaayo nga mahibaloan sa mga magtotoo ni Cristo. Kinahanglan atong mahinumdoman ang *tanang pito ka usa* sumala sa makita sa Efeso 4:4-6:

1. **USA KA LAWAS** - Dili na ang mga Judio una, apan karon ang mga Judio ug mga Gentil mahimong sakop sa *usa ka Iglesia, usa ka Lawas* nga si Cristo ang Ulo sa dihang sila naluwas. Didto sa mapa imong makita ang LAWAS NI CRISTO nga atua sa langitnong mga dapit, diin si Cristo nagalingkud, ug kita mga magtotoo ni Cristo, nahimong bahin sa Iyang Lawas, kita nagalingkud sa langitnong mga dapit uban Kaniya, Efeso 2:6, 13-16.
2. **USA KA ESPIRITU** - Ang Balaang Espiritu nagbautismo kanato ngadto sa kamatayon ni Cristo sa dihang mitoo kita sa Iyang kamatayon, paglubong, ug pagkabanhaw sa ika tulo (3) kaadlaw sa atong Ginoo ug Manluluwas nga si Jesu-Cristo. Iya usab kitang gibanhaw uban kang Cristo aron sa paglingkud sa langitnong mga dapit, ug nagsilyo kanato diha kang Cristo aron dili na gayud kita mahimulag pa Kaniya, Efeso 1:13, Roma 8:38-39. Kinahanglan nato masabtan nga ato nang nabatonan kini nga mga panalangin bisan pa nga ania pa kita sa kalibutan, dinhi sa atong yutan-ong mga lawas.

3. **USA KA PAGLAUM SA ATONG PAGTAWAG** – Ang Bulahang Paglaum mao nga ang Ginoo motawag sa tanang sakop sa Iyang Lawas, patay ug buhi, aron makig-uban na Kaniya sa walay katapusan. Atong gigamit ang eroplano sa TUGPAHANAN SA GRASYA ingon nga simbolo sa LAWAS NI CRISTO, nga pagasakgawon aron makig-uban na ni Cristo sa tanang panahon. Sa kalit sa usa ka pagpamilok, ang atong mga lawas pagaalisdan ug lawas sama sa lawas sa atong Ginoong Jesu-Cristo, Tito 2:13, 1 Tesalonica 4:13-17, 1 Corinto 15:51-54.
4. **USA KA GINOO** – Ang atong Ginoong Jesu-Cristo mao ang Usa nga nahigugma kanato ug mihatag sa Iyang kaugalingon alang sa mga sala, nga karon nagaampo ug nagapataliwala alang kanato ug kinahanglan ato Siyang himayaon diha sa tanang mga butang, Galacia 1:4, Roma 8:34, 1 Corinto 10:31.
5. **USA KA PAGTOO** – Kini mao ang mga kamatuoran nga gitugyan ngadto kang Pablo ni Ginoong Jesu-Cristo alang sa Iglesia sa Dios nga mao ang LAWAS NI CRISTO, Efeso 3:2-10, 1 Corinto 12:27.
6. **USA KA BAUTISMO** – Kini mao ang bautismo sa Espiritu nga nagabautismo kanato ngadto ug naghimo kanato nga mga sakop sa LAWAS NI CRISTO, 1 Corinto 12:13. Si Cristo daghan ug mga sakop sa Iyang Lawas, maingon nga aduna kitay mga kamot, mga tiil, mga bukton, ug kini nagakahiusa sa pagbuhat sumala sa pagmando ni Cristo ang Ulo, Roma 12:5, Colosas 1:18.



Tinubdan: Sweet Publishing – kini ilustrasyon lamang ni Pablo nga nagasulat gikan sa bilanggoan

7. **USA KA DIOS UG AMAHAN SA TANAN** – Ang Dios nahimo natong amahan tungod kay kita nahiusa man sa Iyang Anak, ang Ginoong Jesu-Cristo. Kita usab nahimong isigkamanunod uban Kaniya, Efeso 1:11, 3:6.

Nakita ba nimo ngano nga usa kini ka mahimayaon nga bahin diha sa DALAN SA KINABUHI? Ang pagkahimong *usa ni Cristo*, nahimong bahin Kaniya, ug kana tungod sa grasya; usa ka butang nga wala gayud mahibaloi sa mga balaan sa ubang mga kapanahonan, Efeso 3:5.

Unsa kaha sa imong hunahuna nga kinahanglan buhaton sa mga tawo nga nahimo na nga bahin ni Cristo ug gipanagtawag nga *mga anak sa Dios* (Galacia 3:26)? Si Pablo nagasulti kanato nga kinahanglan kita magagawi ingon nga mga balaan. Kinahanglan itumong ang atong mga hunahuna didto sa mga butang sa itaas, bisan kita nagakinabuhi pa niining kalibutan, Colosas 3:2. Sa Efeso 4:17-32 ug Colosas 3, kita gisugo unsaon nato sa pagkinabuhi.

Kita magakinabuhi aron ang mga tawo sa atong palibut makahibalo nga kita mga anak sa Dios. Usa ka butang nga sigurado – ang atong pagbarug sa kamatuoran walay hinungdan kon ang atong pagkinabuhi dili muhaum sa atong testimonyo. Sa Efeso 2:1-2, ang apostol nagapahinumdom kanato nga kita kaniadto “mga patay diha sa atong mga kalapasan ug mga kasal-anan, nga niini kita kaniadto nanaggawi uyon sa paagi niining kalibutana...” Apan sa Roma 6:4, siya miingon nga kita gibanhaw na aron magagawi diha sa kabag-o sa kinabuhi. Kinahanglan aduna gayud daku nga kausaban sa atong paggawi human kita maluwas. Kon wala may kausaban aduna gayud pagduda sa iyang pagkabanhaw ngadto sa “bag-ong kinabuhi” ug sa iyang kaluwasan sa walay katapusang kamatayon.

Kita utangan sa Espiritu, nga nagapuyo dinhi kanato, dili sa unod. Kay ang Espiritu ania man kanato aron sa pagtabang, wala kitay katarungan nga magareklamo sa atong mga kaluyahon o magapangulipas sa atong mga sala pinaagi sa pag-ingon, “Ang espiritu matinguhaon, apan ang unod huyang,” o “akoy usa ka tawo lamang.” Ang pangutana sa panahon sa pagtintal, *nagatinguha* ba gayud kita sa pagdaug, kay ang pagluwas tungod man sa grasya pinaagi sa pagtoo. *Dili tinuod* nga ang magtotoo dili na makasala, apan *usa* kabulahan nga kamatuoran nga sa tanang kahigayonan mahimo niya nga dili siya makasala, ug kon magtinguha gayud kita nga maluwas gikan sa paghimo ug sala sa mga panahon sa tintasyon, anaa ang Espiritu andam motabang, Roma 8:12-15.

Niining atong panahon karon, ang Judio ug Gentil anaa na sa samang kahimtang ug kinahanglan makaduol sa pagpakig-ambitay sa Dios ingon nga *usa*, wala nay kalainan. Ang kaluwasan libre ug mahimong maangkon pinaagi sa pagtoo sa Ginoong Jesu-Cristo ingon nga *bugtong Manluluwas gikan sa linaw nga kalayo ug sa sala*. Dihadiha, sa pagsalig kang Jesu-Cristo ingon nga imong kaugalingong Manluluwas gikan sa impyerno, ikaw gibautismohan sa Espiritu Santo aron mahimong sakop sa langitnong LAWAS NI CRISTO.

SAG-ULOHON NGA BERSIKULO: “Kay tungod sa grasa kamo nangaluwas pinaagi sa pagtoo; ug kini dili sa inyong kaugalingong kahimoan, kini hatag sa Dios – dili tungod sa mga binuhatan aron walay bisan kinsa nga magapasigarbo.” Efeso 2:8,9.

PAGTULON-AN 24 – BULOHATON

Direksyon: Isulat ang hustong tubag sa mga pamahayag o pangutana.

1.-3. Paghatag ug hamubo nga sumada sa atong pagpanaw:

4.-6. Unsa man ang PITO KA USA nga nagahulagway sa mga magtotoo ni Cristo karon, Efeso 4:4-6.

- _____ ;
- _____ ;
- _____ ;
- _____ ;
- _____ ;
- _____ ;
- _____ ;
- _____ ;

7.-9. Pangitaa ang unom (6) ka mga butang sa Colosas kapitulo 3, nga gitudlo ngadto sa mga magtotoo ni Cristo nga iyang pagabuhaton kon ugaling siya nabanhaw na uban kang Cristo.

- _____ (v.2);

- _____

_____ (v. 5-6);

- _____

_____ (v.9-10);

- _____

_____ (v.12-13);

- _____
_____ (v.15);

- _____

_____ (v.16).

10. Isulat ang Efeso 2:8,9: _____

